

Il mas-chalch da Sent



Publicaziuns officialas. Cumpara seguond bsögn.
2006/2008
no. 45

7554 Sent, 15 schner 2008 / mw

Publicaziun da fabrica

Reguarda:	Chasa d'abitar Avant Baselgia 77, adattamaint ed ingrondimaint abitaziun parc. no. 262
Patrun da fabrica:	Nogler Emilia, Avant Baselgia 77
Profilà:	14.01.08
Publicaziun:	15.01.08
Termin da protesta:	04.02.08

Ediziun: Tuot ils plans sun exposts in büro cumünal.

Recuors: Protestas da dret public sun d'inoltrar infra 20 dis in scrit, a partir da la data da publicaziun, al Cussagl cumünal.

In nom da la cumischiun da fabrica

Orientaziuns a regard il svilup da las organisaziuns turisticas in EB ed a Sent

Sün iniziativa dal chantun s'esa landervia a fuormar uschedittas destinaziuns turisticas (DMOs). Eir l'Engiadina Bassa sarà üna da quellas destinaziuns. Las organisaziuns turisticas in Engiadina Bassa da Susch fin Martina as unischan per quai ad üna organizaziun cul center a Scuol. Plü tard as faja quint ch' eir la Val Müstair e Samignun fetschan part a quista destinaziun chi varà il nom: Regiun dal Parc Naziunal.

L'ESTSA (Engadin Scuol Turissem SA) vain incumbenzada dals cumüns da manar tout las fatschendas turisticas (Infuormaziuns, reservaziuns, occurrenzas turisticas regionalas,.....), pigliond oura las activitats chi's restrendschan be sül cumün.

Per quel scopo surpiglia l'ESTSA ils büros turistics i'ls cumüns. Quels lavuran inavant sün basa d'ün contrat da prestaziun cun plü o main las istessas incumbenzas sco fin quà.

L'organizaziun da las activitats in cumün (Occurrenzas da tuot gener cun basa turistica, infrastruttura turistica....) vain integrada aint illas incumbenzas dal cumün. Il Cussagl Cumünal prevezza our da quel motiv da s-chaffir üna cumischiun pel turissem permanenta (analog a la cumischiun da fabrica) chi evada quellas dumondas. A quella cumischiun sta a disposiziun per chosas administrativas eir il büro turistic. Cull' ESTSA regla il Cumün quella collavuraziun in ün contrat. Implü faja dabsögn d'ün müdamaint illa constituziun cumünala.

Al principi da favrer 08 gnarà clomada aint üna radunanza cumünala per preschantar e decider sur dals pass manzunats survart.

Cussagl cumünal

Fit da retard e fit da restituziun a partir dals 1. schner 2008

Ils fits per quints cumünals e dabuns vegnan fixats sco cha'l Chantun pratescha:

1. fits da retard 5 %
2. fits da restituziun 2 %

Chascha cumünala

Imposta a la funtana:

A partir dals 1. schner 2008, sun gnüdas müdadas las tariffas da **l'imposta a la funtana**. Formulars novs cun las tariffas actualas, pon gnir retrats a partir da subit, pro la cancellaria cumünala.

Società da gymnastas Sent

Radunanza generala da la società da gymnastas Sent, chi ha lö in lündeschdi als 28 schner 2008, a las 20.00 h al hotel Rezia.

Tractandas:

- | | | | |
|---|-----------------------------|----|-------------------------|
| 1 | bivgnaint | 6 | contribuziun |
| 2 | tscherna d'üna scrutinadura | 7 | elecziuns |
| 3 | protocol | 8 | program da l'on |
| 4 | rapports annuals | 9 | müdamaints dals statuts |
| 5 | rendaquint da las revisuras | 10 | varia |


La contribuziun annuala per l'on 2008 importa frs. 50.00 e vain inchaschada a la radunanza generala. Commembras novas sun fich bainvissas.

**Per la gymnastas, la presidenta
Erica Clalüna**

Giantar cumünaivel

Gövgia, als 17 schner 2008 in chasa Misoch (chasa cumünala). Duonna Ruth Plouda da Ftan ans trategna d'ürant il giantar cun istorgias. Annunzchas piglia incunter duonna Erica Clalüna, tel. 081 864 07 59 (laschar selngir lösch!).

Erica Clalüna



Prelecziun e discussiun cul scriptur Nicola Bardola

Seis prüm roman „Schlemm“ ha pisserà per grondas discussiuns, impustüt in Germania, in seis pajais da domicil. In Germania es nempe scumandada l'assistenza da mort activa (aktive Sterbehilfe).

Nicola Bardola – il scriptur cun ragischs engiadinaisas – s'ocuppa eir in seis roman actual „der begleitete Freitod“ culla tematica da l'assistenza da mort. Our da quist roman prelegia l'autur **in venderdi ils 25 da schner illa Grotta da cultura a las 20.15**. Davo la prelecziun segua üna discussiun cun Dr.med. Iris Zürcher e sar ravarenda Jörg Büchel, davart quistas tematica dispitaivla.

La moderaziun fa Ida Zisler; entrada libra

Grotta da cultura

Chartas dal noms locals

Mardi saira, als 22 schner 2008 a las 20:15 preschantaina aint illa Grotta da cultura las chartas e la glista culs noms locals dal territori da Sent. No dain ün pêr infuormaziuns generalas e muossain alch detagls cul beamer. Chi chi voul ha amo la pussibilità da postar quella saira noss prodots.

**Claudio Vital
Carl Mosca
Cla Rauch**